



Broj: 11-03/02-39-~~1~~/23

Sarajevo, 24. 05. 2023. godine

SKUPŠTINA KANTONA SARAJEVO

n/r Elvedin Okerić, predsjedavajući Skupštine Kantona Sarajevo

-Ovdje-

Predmet: Odgovor na zastupničku inicijativu, dostavlja se


Cijenjeni,

Zastupnica u Skupštini Kantona Sarajevo **Marijela Hašimbegović** dana 19. 05. 2023. godine, uputila je zastupničku inicijativu:

„Pokrećem inicijativu radi organizovanja sastanka između Ministarstva za odgoj i obrazovanje sa Udruženjem Vijeće roditelja učenika osnovnih i srednjih škola radi usaglašavanja dokumenta koji se tiče hodograma, protokola vezanog za postupanje u kriznim situacijama u školama uslijed potencijalne prijetnje sigurnosti uzrokovane nevoljnim radnjama učenika/ca u kojima postoji opasnost ugrožavanja vlastitog ili života drugih lica“.

Odgovor: Ministarstvo za odgoj i obrazovanje je realiziralo sastanak sa predstavnicima Udruženja Vijeće roditelja učenika osnovnih i srednjih škola Kantona Sarajevo u utorak 16. 05. 2023. godine, te smo uputili zajedničko saopćenje za javnost, uz obavezu Ministarstva da dostavi dopunu informacije Vijeću roditelja učenika osnovnih i srednjih škola, što je Ministarstvo i učinilo dana 22. 05. 2023. godine, dopunu informacije Vam dostavljamo u prilogu akta. Nakon realiziranog sastanka i dodatne komunikacije sa Vijećem roditelja učenika osnovnih i srednjih škola, sve nejasnoće su obrazložene u najboljem interesu učenika.

S poštovanjem,



Naida Hoti-Muminović

Prilog: Dopuna Informacije dostavljena Vijeću roditelja učenika osnovnih i srednjih škola



Bosnia and Herzegovina
Federation of Bosnia and Herzegovina

CANTON SARAJEVO
Ministry for Education

Broj: 11-03-02-34-27879-31/22
Sarajevo, 22. 05. 2023. godine

UDRUŽENJE „VIJEĆE RODITELJA UČENIKA OSNOVNIH I SREDNJIH ŠKOLA KANTONA SARAJEVO“

PREDMET: Dopuna Informacije, dostavlja se

Cijenjeni/Cijenjena,

dana 04. 05. 2023. godine i dana 09. 05. 2023. godine svim osnovnim i srednjim školama smo dostavili preporuke za rad sa učenicima i roditeljima učenika, nakon kriznog, tragičnog događaja u susjednoj Srbiji.

U situaciji u kojoj smo se našli kao društvo poslije izuzetno stresnog događaja u Beogradu, Srbija, 3. maja 2023. godine, bilo je potrebno izdati preporuke školama s ciljem smanjenja stresa kod učenika. Uposlenici Ministarstva za odgoj i obrazovanje i Instituta za razvoj preduniverzitetskog obrazovanja, članovi Mobilnog tima za krizne intervencije obilazili su osnovne i srednje škole, te opservirali načine postupanja škola prilikom incidentnih situacija unutar škola, te identifikovali rizične situacije i određene teškoće sa kojima se suočavaju direktori i stručni saradnici škola. Stoga je Ministarstvo procijenilo da zbog nepostojanja propisanih procedura u hitnim, kriznim situacijama na nivou Kantona, a u uvažavajući postupanje u najboljem interesu svih učenika školama dostavi dopunu preporuka u slučaju da učenik prijete da će ugroziti svoj ili tuđi život.

Navedene preporuke dostavili smo i VRKS kao što smo vam dostavili i mnoge druge akte ranije za koje smo smatrali da je važno da budete upućeni i upoznati sa istima. Uvidjeli smo da su dopunjene preporuke izazvale zabrinutost jednog dijela roditelja, a na sastanku sa predstavnicama VRKS održanom u utorak 16. maja 2023. godine obaviješteni smo da je VRKS zaprimilo iz baze niz upita i reakcija na navedene preporuke.

Na navedenom sastanku sa predstavnicama VRKS pojasnili smo da je akt poslan školama na dalje postupanje, **a u vezi hitnih, kriznih situacija koje podrazumijevaju** obavezu pozivanja policije, jer se radi o krivičnom djelu ugrožavanja sigurnosti, kao i roditelja učenika koji prijete da će ugroziti svoj i/ili tuđi život, kao i dio koji glasi "Učenik/učenica koji prijete da će ugroziti svoj ili tuđi život na bilo koji način, odmah, bez odlaganja se šalje, u pratnji roditelja, na psihijatrijski pregled na Kliniku za psihijatriju, Odjeljenje za dječju i adolescentnu psihijatriju Kliničkog centra Univerziteta u Sarajevo. Škola je u obavezi napisati preporuku za psihijatrijski pregled na Klinici uz kratko obrazloženje i opis ponašanja kao i razlog zašto se učenik upućuje na pregled na Kliniku za psihijatriju, Odjeljenje za dječju i adolescentnu psihijatriju."

Ova vrsta upute data je jer se radi o hitnoj situaciji, u kojoj može biti ugrožen život učenika koji prijete ali i drugih učenika i cijele škole. Nadalje, dva dječja psihijatra rade samo na navedenoj Klinici, dok centri za mentalno zdravlje nemaju zaposlen navedeni stručni kadar. Svakako se podrazumijeva da



će škola, kao profesionalna organizacija sa jasno određenom strukturom i stručno zastupljenim osobljem (školski psiholog, pedagog, socijalni radnik) navedenim preporukama pristupiti profesionalno, u dobroj vjeri i po standardima profesije koji se primjenjuju.

Kada kažemo “škola” naravno da tada podrazumijevamo da se to odnosi na cjelokupno osoblje škole, ko god bude u doticaju sa određenim izazovom koji se postavi pred školsku zajednicu. To uključuje nastavnike, pedagoga, školskog psihologa, socijalnog radnika, sekretara, direktora, sve prema dostupnosti i **uz jasno određene uzuse koji se primjenjuju u navedenim profesijama.**


Također smo pojasnili da se ovaj dio preporuka ne odnosi isključivo na učenike “koji su već ranije evidentirani kroz pravilnike o sekundarnoj prevenciji, tj. učenike kod kojih su ranije zabilježeni oblici neprihvatljivog ponašanja”. Prijetnje da će učenik “ugroziti svoj i/ili tuđi život” mogu doći i od učenika/učenice koji nisu ranije imali evidentirane oblike nepoželjnog ponašanja, što je, bio slučaj u ubistvima u Beogradu.

Molimo za razumijevanje da je potrebno da osiguramo minimum elemenata kako bi se postigla sigurnost u školskim zajednicama kako za učenike pojedinačno, tako i za cjelokupnu školsku zajednicu. Izazove u dvije navedene krizne situacije – kada učenik prijeti da će ugroziti svoj ili tuđi život ne mogu rješavati isključivo škole, već se po zakonu odmah poziva policija i uključuju i drugi resursi iz zajednice kako bi se napravila procjena o ozbiljnosti navedenih situacija i spriječio rizik od kopiranja događaja iz Beograda.

Događaj u Beogradu poziva nas da preispitamo postojeće prakse i da ih unaprijeđujemo. Podsjetit ćemo, da mi u Kantonu Sarajevo već primjenjujemo okvir za sekundarnu prevenciju čime smo se kao profesionalci obavezali da primjećujemo oblike nepoželjnog ponašanja i da adekvatno reagujemo. U saradnji sa Institutom za razvoj preduniverzitetskog obrazovanja dodatno ćemo raditi na primarnoj prevenciji u vidu sadržaja, aktivnosti i programa kojima jačamo karakterne snage učenika, povećavamo otpornost i kreiramo prilike da učenici razviju svoj puni stvaralački potencijal. Nastavit ćemo još snažnije raditi na jačanju stručnih kompetencija svih radnika u obrazovanju. U narednim godinama nastavit ćemo intenzivno ulagati u školski ambijent i opremu kako bismo dosegli najbolji standard – funkcionalno i estetski. Nadamo se da će nam VRKS ostati partner i u dijelu razvoja “škole roditeljstva” čime bismo ojačali roditeljske kompetencije, svjesni da se i porodice susreću sa izazovima roditeljstva u savremenom društvu.

Žao nam je što smo prouzrokovali nelagodu kod jednog dijela roditelja, jer je navedeni akt namijenjen isključivo za stručne saradnike u stručnim službama škola. Nadamo se da smo ovim pojašnjenjem barem djelimično osvijetlili naše namjere i uvjerali vas da kao obrazovna vlast radimo u najboljem interesu učenika-djeteta, kako kroz stalne aktivnosti na prevenciji, tako i kod definisanja načina postupanja u slučaju iznenadnih kriznih situacija.

S poštovanjem,





Adresa: Reisa Džemaludina Čauševića 1, 71 000 Sarajevo

Tel: + 387 (0) 33 562-128

Web: <http://mo.ks.gov.ba>, E-mail: mo@mo.ks.gov.ba